

■ PCD GRISCHUNA

Votà raschunaivlamain e consequentamain

(cp) Las votaziuns federalas da dumengia passada èn sa splaiadas gist tenor las parolas da la Partida cristiandemocratica (pcd) grischuna ed han uschia confermà sia politia raschunaivla, persistente e consequenta. Cun dir gea a la nova lescha d'asil sustegn la pcd ina procedura pli sperta e faira. Confederaziun, chantuns e vischnancas vegnan distgargiads e quels che tschertgan segirezza giuridica vegnan pli spert tar lur status. – Cun in fitg cler na a l'iniziativa populistica davart il Service public ha la populaziun decidì cleramain da na far experiments cun ina fin malsegira.

Satisfacziun munta per la pcd er il cler na a la uschenumnada finanziaziun «faira» dal traffic. Il pievel svizzer ha exprimì qua tras ch'el na veglia betg midar il sistem sa cumprovà e tuttavia na sin cust da la cassa federala. – Legraivel è era che l'iniziativa per in'entrada da basa nuncundiziunada è vegnida refusada. Ins n'ha betg vulì sa laschar enten experiments cun consequenzas malsegiras. La pcd dal Grischun beneventa fitg quella na.

Elecziuns communalas – cun gudogns e perditas

Zunt satisfatga è la pcd chantunala da l'onurifica elecziun dad *Erich Kohler* sco nov president communal da Domat. Suenter ina interrupziun da 16 onns è quest presidi communal puspè turnà tar la pcd ch'è la pli ferma partida locala. Tant ad el sco er als suprastants reelegids *Gabriela Aschwanden* ed ad *Armin Tanner* gratulescha la pcd. – In'ulteriura gratulaziun va a *Jacobina Knölle-Spescha*, vegnida reelegida en il cussegl grond (legislativa) da Tavau.

L'esit da las elecziuns communalas en la citad da Cuira deplorescha la pcd. Be per paucas vuschs ha ella perdì in sez en la legislativa ed ha là anc dus represchentsants confermads: *Carla Maissen* e *Romano Cahannes*. Deplorablamain n'è l'elecziun da *Peter Portmann* en il cussegl da la citad betg reussida, malgrà l'engaschè cumbat electoral. Cun 1849 vuschs ha el cuntanschì in bun resultat. La pcd chantunala e quella da la citad vegnan ad analisar da cuminanza las elecziuns communalas da Cuira e trair las consequenzas ordlonder.